

謀諸上座。上座允之。乃印刷之。則字畫鮮明章句精正。頗為善本。古人曰。流通法者莫若於印造。吁上人意蓋在於此歟。頃日余應諸子之囑講此書。因粗據其引由爾

安政戊午春正月

緣山南溪圓海撰

教誡新學比丘行護律儀

終南山沙門道宣述

觀夫創入道門未即閑其妙行。要遵承以法訓。方乃曉其律儀。事若闕於師承持護冥然無準。故知不有教誡行相誰宣。不有學人軌模奚設。然釋迦行化法本西天。自金口收光言流東域。化教含其漸頓灑定水於三千。制教輕重斯分熏戒香於百億。律制五年依止意在調伏六根。有智聽許離師。無智猶須盡壽。屢有初心在道觸事未諳。曾不尋其教章於法每纏疑網。或非制而制。是制便違。或云。我是大乘之人不行小乘之法。如斯者眾。非一二三。此則內乖菩薩之心。外闕聲聞之行。四儀既無法潤。乃名枯槁眾生。若此等流古今不絕。自非持法達士孰能鑒之者哉。時有學人運情疎躁。求行者少。求解者多。於制儀門極為浮漫。夫以不修禪那三昧長乖真智之心。不習諸善律儀難以成其勝行。是以古今大德實為世者良田。淨業成於道儀。清白圓於戒品。氣高